

M107G: Heinrich: 'Litanei' (G)

0,0 – .
0,1 herzen schouwære .
0,2 vore dem des muotes sagerære .
0,3 sîniu tougen nie ne mac versperren .
0,4 nieht ne lâ mir gewerren .
0,5 mîne manige missetât .
0,6 sô ne würde mîn nie mêr dechein rât .
0,7 dû wellest mich veste machen .
0,8 der lîp ist ze vleischlîchen sachen .
0,9 weich unde uohaldic .
0,10 sô bist abe dû hêrre sô gewaltic .
0,11 daz dû in wole gesterken maht .
0,12 mit dîner gotelîchen kraft .
0,13 ein kampf hân ich entvagen .
0,14 daz ist ienoch unergangen .
0,15 daz an mir ze allen stunten .
0,16 die tugende habent mit den sünden .
0,17 wârer schirmære .
0,18 dû wis der vorevehtære .
0,19 vüre die tugentlîchen schare .
0,20 daz si von dem herzen vertrîben algar .
0,21 der sünden blîjîne messe .
0,22 sô wirdet der sin wesse .
0,23 von dir ze vernemenne und ze redenne .
0,24 dû gip uns hêrre vater vergebene .
0,25 daz uns ze dem lîbe und ze der sêle gevrumen .
0,26 und gebiut dînem einborenen sune .
0,27 daz er uns sende sînen trôstgeist .
0,28 alsô dû unser angest vile wole weist .
0,29 unser broede diu ist sô michel .
0,30 daz wir schiere werden beswichen .
0,31 iz ne stüente an sîner milte .
0,32 daz er mit sînem vrideschilde .
0,33 uns behüete in disem wîge .
0,34 unze wir nâch disem lîbe .
0,35 entvâhen den himelischen lôn .
0,36 dâr umbe sprechen wir kyrie eleison .
0,37 an dir êwiger vater stêt der gewalt .

0,38 des werc die sint manicvalt .
0,39 der schaffet unde antreitet .
0,40 der vüeget und zeleitet .
0,41 der zimberet und zerbrichet .
0,42 der entlîbet unde richet .
0,43 der heiliget und verdamnet .
0,44 er stoeret unde samenet .
0,45 er zürnet und vergizzet .
0,46 er slehet und vermisset .
0,47 er wundet unde heilet .
0,48 er geheltet unde teilet .
0,49 er gît und entzücket .
0,50 er hoehet und verdrücket .
0,51 er hât allez daz wole vüre brâht
0,52 des dû von aneenge hiete gedâht .
0,53 alsô der dîn vüresihtige wîstuom .
0,54 daz ist dîn ebenêwiger sun .
0,55 dir gap volleist unde rât .
0,56 der ouch maniger slahte namen hât .
0,57 die wolte ich gerne künden .
0,58 getörste ich vore mînen sünden .
0,59 wan daz ich des guoten trôst hân .
0,60 iz mege mir wole alsam ergân .
0,61 alsô dû hât gesprochen in dem wîssagen .
0,62 swer sich zuo dir welle gehaben .
0,63 ist er von sünden swarz worden êr .
0,64 dû machest in wîz sam ein snê .
0,65 der selber genâden biren wir von dir gewis .
0,66 pater de caelis .
0,67 er heizet dîn wort und dîn gebot .
0,68 wârer mennische und wârer got .
0,69 er heizet wunderlîcher râtgebe .
0,70 lebentigez brôt wâriu wînrebe .
0,71 starker got vürste des vrides .
0,72 orthabe des lîbes . vener des siges .
0,73 er heizet berc tal unde wec .
0,74 brügge . stege und stec .
0,75 engel wîssage unde êwart .
0,76 lewe ein brunne unde lêbart .
0,77 are kalp unde lamp .
0,78 er heizet unser heil und unser heilant .
0,79 unser süenære .
0,80 und unser mittelære .
0,81 enzwischen dir hêre vater unde uns .
0,82 daz sint die namen dînes sunes .
0,83 nû ervülle dû heiliger geist .
0,84 mit werken daz dû an den namen bist .
0,85 und bedenke alle unser nôt .

0,86 dû mit dînem tôde unsern tât .
0,87 zevuortest an dem stamme .
0,88 dâ mit uns in disem wuofklamme .
0,89 verstieze Adâmes gîte .
0,90 daz vertîligete daz bluot daz ûz dîner sîte .
0,91 unde ûz andern dînen wunden vlôz .
0,92 durch daz sprechen wir Christe audi nos .
0,93 heiliger geist wârer voget .
0,94 den nieman wirdiclîchen lobet .
0,95 dû ne schepfest dei wort in sînem sinne .
0,96 mit dem viure dîner minne .
0,97 alles guotes aneenge .
0,98 diu meil mîner zungen dû verbrenne .
0,99 die deme herzen lûteren sin benement .
0,100 ze sprechenne dei wort dei dir gezement .
0,101 dû heizes wîstuomes brunne .
0,102 ein slüzzel der barmunge .
0,103 der armen troestære .
0,104 reiner herzen minnære .
0,105 ein wec des êwigen lîbes .
0,106 ein marc des himelischen stîges .
0,107 dû bevogetest und besüenest .
0,108 dû brennest und küelest .
0,109 dû viuhtest und derrest .
0,110 dû entsliuzest und sperrest .
0,111 dû wonest und vliuhest .
0,112 dû sterkest und schiuhest .
0,113 dû bevrident unde behüetest .
0,114 dû quickest unde brüetest .
0,115 dû entswebest unde weckest .
0,116 dû vertîligest und entdeckest .
0,117 mit disen mislîchen gâben .
0,118 solt dû nâch dînen genâden .
0,119 unserm durren herzen geben .
0,120 dînen geistlîchen regen .
0,121 dannen wir den wuocher megen geben .
0,122 des wir sîn êwiclîchen ernern .
0,123 mit dînem viure dû erliuhte .
0,124 und verbrenne die viuhte .
0,125 mennischlîcher gelüste
0,126 unde aller âkuste .
0,127 sô mûgen wir gereite .
0,128 in der rehten sicherheite .
0,129 sîn des himelrîches gewis .
0,130 – – .
0,130a – – Maria
0,131 liehtiu magetuomes gimme .
0,132 der engel vürstinne .

0,133 pfalnze des himeles .
0,134 gemahle des êwigen küniges .
0,135 dû bist diu beslozzenu porte .
0,136 von der der wîssage hôrte .
0,137 dô im der engel zeigete ein goteshûs .
0,138 er sprach . “her in sol werden unde hin ûz .
0,139 unserm hêrren ein vrîiu vart .
0,140 unde sol diu porte iemer sîn bespart .”
0,141 diu bezeichnenet dich und dînen sun .
0,142 der den êwiclîchen magetuom .
0,143 nâch der geburt behielt sam ouch êr .
0,144 dû bist von der wurzen Jessê .
0,145 ein gerte ûz ersprungen .
0,146 diu den bluomen hât gewonnen .
0,147 von dem der wâz kumet aller genâden .
0,148 uns allen die dô lâgen
0,149 in der wüeste der sünden unberhaft .
0,150 dîn wuocher vrouwe hât uns widerbrâht .
0,151 ze dem wuocher aller tugende .
0,152 des wis an mir gehügente .
0,153 muoter der barmunge .
0,154 diu vorder missehellige .
0,155 ze der uns daz êreste wîp vrumete .
0,156 ienoch si unzemuort stüente .
0,157 die die engel hêten ûf die mennischheit .
0,158 wan durch dînen trôst wâriu meit .
0,159 wir lesen von dînen vordern .
0,160 daz ist an der schrift unverborgen .
0,161 swanne die engel zeigen sich in geruochten .
0,162 daz si ire vuoze dâr umbe suohten .
0,163 daz hât dû gebezzert allez .
0,164 alsô der guote sancte Johannes .
0,165 ze trôste schrîbet uns allen
0,166 dô er dem engel ze vuozen wolte vallen .
0,167 der in die gotes tougene lêrte .
0,168 daz er sich von im sâr kêrte .
0,169 er sprach bewar daz dû sîn nie ne tuost .
0,170 unsern hêrren einen dû ane beten muost .
0,171 ich bin ein ebenschalc dîner .
0,172 unde ander knehte sîner .
0,173 solicher genâden bist dû orthabe .
0,174 unde wære ich hêrer denne ein wîssage .
0,175 olde wære sîn geist in mînem munde .
0,176 dannoch ne mehte ich noch ne kunde .
0,177 dich geloben als ich solte .
0,178 wer möhte dem geliutertem golde .
0,179 daz kupfer gelîchen .
0,180 doch sehen wir tegelîchen .

0,181 daz diu rôse wehset ûz dem dorne .
0,182 sam loben wir dich geborene .
0,183 von der bittern judenscheffe .
0,184 diu mit grôzem unrehte .
0,185 ze den zîten bevangen was .
0,186 dô dû rehte sam ein liehtvaz .
0,187 schine über alle vinsten .
0,188 sam der sunne durch daz glasevenster .
0,189 derliuhtet den tunkeln sal .
0,190 sam tæte dû die werlt überal .
0,191 wir zellen dich ze einem garten .
0,192 gezeichneten und besparten .
0,193 dâ der boum inne wuohs .
0,194 von dem uns des hungers wart buoz .
0,195 den uns unser vordern .
0,196 êr diu hêten erworben .
0,197 mit lasterlîcher gîte .
0,198 nû dû wâriu margarîte .
0,199 aller himelkoere .
0,200 nû wasche mich mit dem trôre .
0,201 dâ dich der heilige geist mit begôz .
0,202 dô er dich dem gotessune ze einer muoter kôs .
0,203 dû bist gesegenet vore allen wîben
0,204 wande dû eine mahtest vertriben
0,205 von uns den êwigen tôt .
0,206 dû bist der ûf stênte morgenrôt .
0,207 erweltiu sam der sunne .
0,208 schoene sam diu mæninne .
0,209 eislich sam diu gewæfenete schare .
0,210 wan dû dem gotessune ein gare .
0,211 gæbe ûz dîner wambe .
0,212 dâ er unser vîande .
0,213 inne gewalticlichen ervaht .
0,214 nû mane dû sîne magenkraft .
0,215 daz er mich vore den sünden beware .
0,216 daz ich niemer sô ne gevare .
0,217 ich ne genieze dîner gebûrte .
0,218 ze sîner gegenwürte .
0,219 tochter Dâvides .
0,220 wec des êwigen lîbes .
0,221 irretuomes ende .
0,222 tôdes urstende .
0,223 lebentigiu brunâder .
0,224 ûz der diu runse vlôz aller genâden .
0,225 wurze aller güete .
0,226 von der der ast erbluote .
0,227 der sich wîten hât gebreitet .
0,228 unde sîniu zwî geleitet .

0,229 von der erde durch die himele .
0,230 und von dannen her widere .
0,231 durch daz inner apgründe .
0,232 daz er die stricke mîner sünde .
0,233 genædiclichen entbinde .
0,234 daz gebiut dû vrouwe dînem kinde .
0,235 wande dû maht ieweder tuon
0,236 gebieten sam diu muoter über ire sun .
0,237 unde salt iedoch biten unde êren .
0,238 sam diu sûeze diu ire hêrren .
0,239 daz er gehûge aller dinge .
0,240 die er mit dir durch die süntære begienge .
0,241 vrouwe ich dir dîne êre dâ mite niet ne breche
0,242 daz ich dir sô verre zuo spreche
0,243 wande daz dû geschafft den schepfære .
0,244 dû tohter den vater gebære .
0,245 wer mehte âne got des haben gedâht .
0,246 unde alsô der tôt was brâht .
0,247 aller der werlte von einem wîbe .
0,248 sam muose ze dem êwigen lîbe .
0,249 ein wîp uns wider bringen .
0,250 nû haben wir einen bezzern gedingen .
0,251 danne ob Adâm wære gestanten .
0,252 wir ne durfen sînen val niemer geanden .
0,253 noch sînes wîbes missetât geklagen .
0,254 wir ne pfâhen mêre denne wir verloren haben .
0,255 si brâhte den tôt . dû daz leben .
0,256 si den vluoch . dû den segen .
0,257 si die armuot . dû den rîchtuom .
0,258 sie die schalcheit . dû den vrîtuom .
0,259 daz gevüere übertriffet unsern schaden .
0,260 nû ist sîn nôt nie mêre des wir klagen .
0,261 wan daz si daz paradîse hât beslozen .
0,262 dâ wider machest dû den himel offen .
0,263 und versperrest uns die helle .
0,264 ein bezzer dinc ich ienoch zele .
0,265 ze diu daz nieman in den sünden durfe ligen .
0,266 der mennische hât den engel überstigen .
0,267 vrouwe mit dînes sunes mennischheit .
0,268 des sî im und dir geseit .
0,269 lop und êwigiu genâde .
0,270 nû zervüere kûninginne die lâge .
0,271 der mich die tiuvel niht erlazzent .
0,272 die mir den wec versâzent .
0,273 den ich ze dem rehte solte gân .
0,274 daz ist mîn meistiu angest die ich hân .
0,275 wan daz ich wole weiz daz mîn zuoversiht .
0,276 diu ne verlât mich trût vrouwe niht .

0,277 dû ne gehelfest mir etelîcher vrist .
0,278 umbe den der dîn sun und dîn vater ist .
0,279 nâch sînen genâden wârer buoze .
0,280 daz ich an dem rehten erschînen müeze .
0,281 sô ich ze sîner gegenwürte kume .
0,282 sô bite den – vater und gebiute dem sune .
0,283 gehügen an die müeje dîne .
0,284 dâ nâch tûsent kindelîne .
0,285 die wurden erslagen von Herôde .
0,286 daz er mich von dem êwigen tôde .
0,287 des tages beneme durch die dîne minne .
0,288 daz ich nâch mînen nôtdürften gewinne .
0,289 des liehtes eteslîchen teil .
0,290 daz mir und aller werlte von dir erschein .
0,291 noch biten wir dich himelischiu vrouwe .
0,292 dû von des heiligen geistes viure und von sînem touwe .
0,293 würde gotelîchen bæric .
0,294 sîn wuocher daz was sælic .
0,295 dô dû âne mannes kûnde .
0,296 soliches wonders an dir entstüente .
0,297 daz der natûre was ungewonelich .
0,298 des muost dû iemer sîn lobelich .
0,299 aller gotes geschefte .
0,300 diu in des tiuvels zoumhefte .
0,301 von rehte iemer mêre wære .
0,302 wan durch den sun den dû gebære .
0,303 ô wê wunderlîchiu kintraht .
0,304 dû hiete wâriu meit dir gedâht .
0,305 êr williclîchen ersterben .
0,306 êr dû iemer muoter woltest werden .
0,307 nâch mennischlîchem site .
0,308 ô wie rehte wole dû sîn entbite .
0,309 der dînes muotes veste .
0,310 sô rehte wole an dir weste .
0,311 er machete dich ze muoter âne man .
0,312 der nie daz insigel entgan .
0,313 dîner meitheite .
0,314 wir sprechen die wârheit .
0,315 ze dînem lobe wâriu meit .
0,316 als uns diu buoch habent geseit .
0,317 dîn wambe in gerlîchen beslôz .
0,318 der sô michel ist und sô grôz .
0,319 daz er alle die himele .
0,320 hât ze sînem gesidele .
0,321 ze einem vuozechamel die erde .
0,322 nû biten wir in daz er werde .
0,323 genædic allen den dînen .
0,324 unde swenne er uns . sule erschînen .

0,325 an dem jungesten urteile .
0,326 daz wir sîn in dem heile .
0,327 daz von dir aller der werlte brâht wart .
0,328 des tages sî uns diu helle bespart .
0,329 daz himelrîche entslozen .
0,330 sô haben wir allerêreste wole genozzen .
0,331 dîner muoterlîchen güete .
0,332 wâriu vogetinne nû behüete .
0,333 dîne schalke hier unde ouch dâ .
0,334 sancta Maria .
0,334a de angelis .
0,335 gotes erzengel hêre .
0,336 mit iuwerm vener sancte Michêle .
0,337 unde ir niune koere alle .
0,338 die nâch des tiuvels valle .
0,339 mit gote stæticlîchen beliben .
0,340 nû helfet uns daz wir gesigen .
0,341 an dem slangen urmæren .
0,342 der mit sînen volgæren .
0,343 hier bevore wider iuch vaht .
0,344 vile bloede was diu sîn kraft .
0,345 dô in der überwant .
0,346 der iuwer kempfe ist genant .
0,347 des lobet ir got über al .
0,348 vile michel wart der sîn val .
0,349 in die êwigen riuwe .
0,350 ô wê sîn gîtigiu kiuwe .
0,351 wie manigen si noch verslünde .
0,352 wie manigen er überwûnde .
0,353 wan durch den trôst den wir von iu haben
0,354 alsô wir sancte Paulen hoeren sagen .
0,355 er sprichet . daz sûmelîche geiste sîn dâr zuo erkant
0,356 die dem mennischen ze dieneste werden gesant .
0,357 die daz erbe sulen entvâhen
0,358 des wâren heiles und der genâden .
0,359 daz uns sîn hônkust benam .
0,360 dô im der êrest mennische wart gehôrsam .
0,361 daz der mennische daz wider gewinne .
0,362 des helfet uns durch die minne .
0,363 dâ mit unser beider vîantschaft .
0,364 ze rehter suone habe brâht .
0,365 âne iuch ne mehten wir niht genesen .
0,366 wande wir haben wærlîchen gelesen .
0,367 daz nehein kristenmennische hiute ne lebet .
0,368 sîn en werde von iuwer etelîchem gepflegt .
0,369 wande diu broede diu ist an unserm vleische .
0,370 daz wir unser kristenlîche geheize .
0,371 gote niemer . ne mehten geleisten .

0,372 iz ne wære daz ir geiste wider den geisten .
0,373 uns hietet in iuwer huote .
0,374 nû ir engel sælige unde guote .
0,375 entvelhet uns gote mit iuvern digen .
0,376 daz wir mit iuvern helfen gesigen .
0,377 in disem zwîvellîchen wîge .
0,378 des wir in disem lîbe .
0,379 niemer werden verlazzen .
0,380 der tiuvel var verwâzen
0,381 ir gestêt uns ze allen zîten bî .
0,382 omnes sancti angeli .
0,382a – – Johanne – .
0,383 semelîche genâde .
0,384 vorderen wir leider trâge .
0,385 daz machent unser schulde .
0,386 von dir gimme und übergülde .
0,387 aller gotes trûte .
0,388 ô wê wie gerne ich dînen namen dûtte .
0,389 ob ich sîn wert wære .
0,390 der name Johannes ze wâre .
0,391 swer sîn daz buoch vrâge .
0,392 er diutet gotes genâde .
0,393 den namen hête dir der engel erkennet .
0,394 nû dû gotes genâde sîst genennet .
0,395 nû genâde mir dînem knehte .
0,396 ich dâ von mêrrem rehte .
0,397 dich vore allen liuten loben sol .
0,398 hiete ich mîne sêle in daz gesol .
0,399 aller laster nieht versenket .
0,400 des sancte Pêter wole gedenket .
0,401 dâ er den süntære bewart .
0,402 swanne er kumet in die rehten vart .
0,403 daz er sîn âkust verlât .
0,404 unde si abe dâr nâch begât .
0,405 er sprichet . er tuo rehte sam der hunt .
0,406 der sîne spîe nimet wider in den munt .
0,407 dem mac ich wole gelîch sîn .
0,408 er sprichet . der tuo ouch rehte sam daz swîn .
0,409 daz sich mêre unsûberic mache .
0,410 swenne iz in der horelachen .
0,411 lît ze diu daz iz sich wasche .
0,412 ô wê ich stoubiger asche .
0,413 ich vlokzenter valwisch .
0,414 ich bin worden sam einer boeser visch .
0,415 von den sünden durchgræte .
0,416 ich bin rehte alsam stæte .
0,417 sam vore der windes briute daz mel .
0,418 oder sam vore dem îsene ist daz eiervel .

0,419 ich brüstigez havenschirbe .
0,420 waz ob ich morgene stirbe .
0,421 dem ich hiute bin genæme .
0,422 dem bin ich danne widerzæme .
0,423 ich vile stinkentez âs .
0,424 ich spriche sam der rabe cras cras .
0,425 daz quiut . morgen morgen .
0,426 daz wile ich gerne besorgen .
0,427 daz ich gote rehte getuo .
0,428 wer gît mir vrist unze vruo .
0,429 ob ich iz hiute ûf schiube .
0,430 ô wê wie dicke ich erliuge .
0,431 swaz ich gote geheize .
0,432 der sünden madewelligen eize .
0,433 die habent mîne sêle verderbet .
0,434 unde habent mich alsam Lazarum ersterbet .
0,435 mîne gewizzene harte mir erviulet .
0,436 wan daz mich ûf siulet .
0,437 der gotes toufære .
0,438 mîn einiger helfære .
0,439 dîn wunderlîche erbermede .
0,440 âne alle mîne geernede .
0,441 sît ich armer mennische hilfelôs .
0,442 dich ze einem helfære erkôs .
0,443 sît hân ich mich des wole verstanten .
0,444 dû hiete mich êr in dînen handen .
0,445 daz solt dû ouch noch behalten .
0,446 wande woltest dû mich entgalten .
0,447 maniger gâchschricke .
0,448 dâ mit mich dicker denne dicke .
0,449 der tiuvel hât verleitet .
0,450 sô wære mir manigen tac gereitet .
0,451 diu êwige verdamnunge .
0,452 daz sol dîn barmunge .
0,453 schaffen allez anders .
0,454 hêrre sancte Johannes .
0,455 etewer mac mir nû vore zeln .
0,456 wie ich dich ie getorste erweln .
0,457 ze einem vogete sunderbære .
0,458 durch daz ich ein süntære .
0,459 und leider ein verworhter mennische bin .
0,460 dem wile ich offenen mînen sin .
0,461 den ich mit der wârheit wole bewære .
0,462 wande dû gotes toufære .
0,463 bist hêrer denne aller mennischen kint .
0,464 die von wîbes gebûrte komen sint .
0,465 âne der engel kûninginne .
0,466 von diu sô muoz ich mich versinnen .

0,467 dû bist ouch genædiger denne ir decheiner .
0,468 von diu sô hân ich unreiner .
0,469 ich hazziger . ich nîdiger .
0,470 ich zorniger . ich giriger .
0,471 ich üfels schüntære .
0,472 ich des tiuvels wuocherære .
0,473 ich aller laster herhorn .
0,474 ich hân dich gotes vener erkoren
0,475 mir einigem dich einigen .
0,476 dich erwelten unde dich heiligen .
0,477 dich guoten unde dich genædigen .
0,478 dich süezen unde dich sæligen .
0,479 dich senften unde dich linden .
0,480 ane wem mac ich nû vinden .
0,481 sô maniger slahte güete .
0,482 swen ich ze mîner armüete .
0,483 ûz allen koeren hête erwelt .
0,484 dâ wærest dû doch ze dem vorderesten gezelt .
0,485 dû wære ein engel die wîle unde dû lebetest .
0,486 dô dû ouch des ambahtes der wîssagen pfleitest .
0,487 der êren bist dû ouch nû niht bestôzen .
0,488 den patriarchen müezen wir dich genozen .
0,489 den zwelivboten alsame .
0,490 under den martiræren ist der dîn name .
0,491 der allervordereste ze wære .
0,492 dich lobent die bihtære .
0,493 dir entwîchent die einsidele .
0,494 dich êren die megede dâr in himele .
0,495 solich ist dîn lôn und dîn êre .
0,496 nû hilf mir heiliger hêre .
0,497 daz ich dich in den tugenden noch gesehe .
0,498 unde swenne ich voget ûf dich jehe .
0,499 ane mîner hineverte .
0,500 sô vertribe dînes gewaltes gerte .
0,501 den tiuvel von dînem knehte .
0,502 daz er mich ieht ane vehte .
0,503 olde schuldigen bringe .
0,504 ze dem gotes teidinge .
0,505 wider dû mîn vürespreche wis dâ .
0,506 sancte Johannes baptista .
0,506a de apostolis .
0,507 Petre der zwelivboten vürste .
0,508 dû bedenke aller unser dürfte .
0,509 die weist dû allerbezziste .
0,510 ûf den diu gruntveste .
0,511 wart der kristenheit geleit .
0,512 diu von den toren der helle nie ne werde beweit .
0,513 wir wizzen wole heiliger hêre .

0,514 daz diu süntige sêle .
0,515 vile harte dir erbarmet .
0,516 des würde dû wole gewarnet .
0,517 bî dem lougene daz dû gotes tæte .
0,518 drî stunte vore hanekræte .
0,519 umbe den dû sît würde erhangen .
0,520 von dem hâst dû nû entvangen .
0,521 die slüzzel der himelischen porte .
0,522 die maht dû wole mit dem gotesworte .
0,523 swem dû wil entsperren und entsliezen .
0,524 nû lâz uns des geniezen .
0,525 des er dich selbe lêrte .
0,526 swenne der schuldige man sich bekêrte .
0,527 dû soldest im vergeben sîne sünde .
0,528 siben unde sibenzic stunte .
0,529 Paule meister der diete .
0,530 vernim daz gebet daz dir biete .
0,531 dîn armiu kristenheit .
0,532 an der dîn arbeit .
0,533 grôz wuocher hât erworben .
0,534 umbe die dû tegelîche sorgen .
0,535 hiete in disem lebene .
0,536 wir hieten iemer von dir ze redenne .
0,537 welich ein gotes wuocherære .
0,538 vore allen heiligen dû wære .
0,539 des ne mac si nieman zuo dir gemâzen .
0,540 nû ist dir der selbe gewalt verlâzen .
0,541 den sancte Pêter dîn geselle hât .
0,542 daz ir den süntæren die meintât .
0,543 müget behaben olde verlân .
0,544 nû sulet ir daz bezzer begân .
0,545 an iuvern undertânen .
0,546 dâr under ne mügen wir uns ouch geânen .
0,547 der helfe ander iuwer gesellen .
0,548 ir sulet uns nâch genâden vüre stellen .
0,549 swanne ir vore gotes gesichte .
0,550 besitzet daz gerihte .
0,551 der jungesten schidunge .
0,552 diu âne barmunge .
0,553 ergêt nihtwær nâch rehte .
0,554 sô beschirmet iuwer knehte .
0,555 vore allem dem dinge und uns schade sî .
0,556 omnes sancti apostoli .
0,556a – –
0,557 süezer vorevehtære .
0,558 aller gotes martirære .
0,559 dû den êresten vanen hûebe .
0,560 unde in ûf die martire trûege .

0,561 dâ dû mit den steinen würde erslagen .
0,562 wir hoeren dei buoch von dir sagen .
0,563 dû erquiktest siben tôten .
0,564 ûz alsemelîchen noeten .
0,565 erledige hêrre sancte Stephan .
0,566 beidiu wîp unde man .
0,567 swer an der sêle verscheiden sî .
0,568 unde ouch dû sancte Laurenti .
0,569 dû dâ würde gebrâten ûf dem rôste .
0,570 kum uns armen ze trôste .
0,571 mit allen dînen gesellen .
0,572 die ne möhten wir niemer gar gezellen .
0,573 doch schulen wir iuch alle des biten .
0,574 sam ir den tiuvel habet überstriten .
0,575 mit der martire iuwers lîbes .
0,576 sam müezen wir geistlîches wîges .
0,577 mit iuwern helfen an im gesigen .
0,578 vore dem uns daz kriuze sol bevriden .
0,579 daz uns got heizet tragen allertegelîch .
0,580 daz ist ze wâre sô unvertregelich .
0,581 an swem er des innen wirdet .
0,582 daz ist der eine den er verbiret .
0,583 daz habet ir uns wole getragen vore .
0,584 nû leitet uns in daz selbe vuozspor .
0,585 des biten wir süntære .
0,586 iuch heilige martirære .
0,586a – – .
0,587 nû biten wir dich sancte Grêgôrî .
0,588 daz uns dîn helfe mite sî .
0,589 dû dâ hier bevore wære .
0,590 des heiligen geistes kamerære .
0,591 dô er dir geruochte erougen .
0,592 den schatz sîner tougene .
0,593 alsô wir an dîner vita haben ervunden
0,594 daz er dir geruochte ze allen stunten .
0,595 in einer tûben bilede erschînen .
0,596 er saz ûf den ahseln dînen .
0,597 ze aller dîner tihte .
0,598 wir entstên ienoch an dîner schrifte .
0,599 daz er dich wêrlîchen lêrte .
0,600 ich wæne er ie ieman sô grôzlîchen geêrte .
0,601 nû hilf dîner armen diete .
0,602 semelîches trôstes den dû hiete .
0,603 von sîner barmunge .
0,604 ze solicher vorderunge .
0,605 wese dîn geverte .
0,606 der guote sancte Merte .
0,607 der drîe tôten erkûhte .

0,608 unde aller slahte gesühte .
0,609 daz ie iemanne gewar .
0,610 daz vertreip er al gar .
0,611 der im gap die êre .
0,612 der erquicke den tôt unser sêle .
0,613 wande doch iuwer hinevart .
0,614 würde genædiclîchen gespart .
0,615 in den kristenlîchen vride .
0,616 doch biret ir sumelîche von dem sige .
0,617 der martirære ungescheiden .
0,618 der mûgen wir ouch einen zeigen .
0,619 den heiligen priester Hieronimum .
0,620 der was ein schellentez organum .
0,621 unde ein pfîfe des heiligen geistes .
0,622 wande swaz wir liebes unde guotes allermeist .
0,623 von gote gelesen unde gehôrt haben .
0,624 des sulen wir allermeiste danc sagen .
0,625 gotes genædicheit .
0,626 unde sîner arbeit .
0,627 Hieronime vile milter man .
0,628 nim zuo dir die ich genennet hân .
0,629 die heiligen bîhtære unde bite .
0,630 daz got tugentlîche site .
0,631 unde solichen gelouben an uns veste .
0,632 dem guoter werke nie ne gebreste .
0,633 unze wir disen lîp verenden .
0,634 des wellen wir iuch ze boten senden .
0,635 an dem wir grôzes trôstes biren gewis .
0,636 orate pro nobis .
0,636a de virginibus .
0,637 Agnes heiligiu maget .
0,638 ze unsern helfen wis geladet .
0,639 dû die werlt vruo verlieze .
0,640 unde dînen magetuom gehieze .
0,641 dem wâren briutegoume .
0,642 sô veste was dîn geloube .
0,643 vüre daz dû in ze trûte erweltest .
0,644 daz dû der werlte ûf seltest .
0,645 alle die êre die si hât .
0,646 dû vermantest küninclîche hîrât .
0,647 der tiuvel muose dîn leit rechen .
0,648 er zebrach den der dâ zebrechen .
0,649 wolte dîne meituomlîche schame .
0,650 der ne vuorte nihtwær den tôt danne .
0,651 den quiktest dû vrouwe mit dînem gebete .
0,652 daz wæne ie dechein mêre getete .
0,653 dû genæme den ende von einem swerte .
0,654 dô dich unser hêre got gewerte .

0,655 einer zwispilden stôle .
0,656 nû erledige uns armen ûz aller kôle .
0,657 des êwigen verlorenes .
0,658 daz wir des gotes zornes .
0,659 râche iecht erarnen .
0,660 diu dâ was ergân über disen armen .
0,661 des wese dîn volleist dâ ze himele .
0,662 diu guote sancte Cecilie .
0,663 diu sich ûzen zierte mit golde .
0,664 und truoc dâr under verholene .
0,665 ein hærîne hemedē .
0,666 dâ mit si dem tiuvel machete vremede .
0,667 alle ire guotæte .
0,668 ô wê welicher wunder ein wîplîcher stæte .
0,669 si hête ire meitheite .
0,670 von gotes genædicheite .
0,671 ein starkez widerwette .
0,672 dô si getorste an ein brûtbette .
0,673 komen mit dem manne .
0,674 der ir gegert hête lange .
0,675 dem dröuwete si den gotes slac .
0,676 ob er ir decheiner slahte ungemach .
0,677 mit iehte getorste erzeigen .
0,678 starke ervorhte daz der heiden .
0,679 ich wile sprechen alsô daz buoch seit .
0,680 der wider dich heiligiū meit .
0,681 sam ein scherfer lewe was ergramet .
0,682 den machest dû senfte sam ein lamp .
0,683 von dem bâbese Urbâne .
0,684 wart er sînen sünden âne .
0,685 in dem toufflichen brunnen .
0,686 dâ wolte im got des gunnen .
0,687 daz er den heiligen engel bî dir vant .
0,688 der brâhte iu beiden in sîner hant .
0,689 zwêne krenze gevlohten ûz den bluomen .
0,690 die in dem paradîse kunnen gruonen .
0,691 iemer mêre âne underlâz .
0,692 die brâhten iu beiden guoten wâz .
0,693 sam ir wært in dem paradîse .
0,694 unde gâben iuwer sêle soliche spîse .
0,695 daz si iuch ûf die martire vrumete .
0,696 nû bite umbe unser sünde .
0,697 dû und diu guote sancte Agne .
0,698 daz wir iecht ze lange .
0,699 in unsern âkusten ligen .
0,700 wir ne müezen dem tiuvel an gesigen .
0,701 unde sînen volgæren .
0,702 des helfet uns süntæren

0,703 ir vrouwen beide .
0,704 und alle gotes meide .
0,704a – – – .
0,705 alle gotes heiligen .
0,706 bevelhet uns gote mit iuwern digen .
0,707 der broede ir wole erkennet .
0,708 ir alle die dâ sîn genennet .
0,709 an des êwigen lîbes buoche .
0,710 die genâde die dâ ze iu suoche .
0,711 iuwer armiu diet .
0,712 ir verseit uns niht .
0,713 daz der wâre gotes sun .
0,714 doch wir ez unwirdiclichen tuon .
0,715 unser gebet erhoere .
0,716 des helfet uns engelische koere .
0,717 patriarche unde prophête .
0,718 unde alle die junger die got hête .
0,719 unde die unser rihtære sulen sîn .
0,720 unde diu gemartereten kindelîn .
0,721 zehenzic vierzic unde vier tûsent .
0,722 und alle die die ire sünde habent beriuweset .
0,723 in diser werlte die wîle si lebeten .
0,724 unde die heiligen müniche die des pflēgeten .
0,725 daz si dei laster an in sluogen .
0,726 und Kristes joch ûf in truogen .
0,727 und die rehte einsidele hiezen .
0,728 die allen den trôst liezen .
0,729 der in von der werlte mahte bekommen .
0,730 mit den die engel dicke geruochten wonen .
0,731 unde die rehte witewen wâren .
0,732 und dâ mit êwiclichen genâren .
0,733 olde die diu êliche hîrât .
0,734 hin ze gote brâht hât .
0,735 unde ir alle sælige sêle .
0,736 die von dem êresten heiligen Abêle .
0,737 unz an disen tac dar komen bîret .
0,738 dâ iu der himelische wirt .
0,739 lônēt nâch iuwerm gedinge .
0,740 mit einigem pfenninge .
0,741 ir ze prîme olde ze nône .
0,742 in dem wîngarten vrône .
0,743 dâr ûfe habet gearbeitet .
0,744 daz ir heim sît geleitet .
0,745 lât uns iu sîn entvolhen .
0,746 daz wir ieht werden verswolhen .
0,747 von des leiden tiuvels kiuwen .
0,748 der umbe uns wirbet entriuwen
0,749 sam der lewe rûchelente . nâch sancte Paules rede .

0,750 unde suochet wen er verswelhen mege .
0,751 nie ne verseit uns iuwer gewegede .
0,752 daz uns armen erledige .
0,753 von süntelîchen banden .
0,754 von wereltlîchen schanden .
0,755 von tîtlîchem sêre .
0,756 von üppiger êre .
0,757 von zorne und von nîde .
0,758 von hazze unde von giredē .
0,759 von der leidigen hôchverte .
0,760 diu uns armen verherete .
0,761 mit dem êrestem manne .
0,762 in disem wuofklamme .
0,763 von unrehtem gewinne .
0,764 von vleischlîcher minne .
0,765 von huorlîcher hitze .
0,766 von des sinnes abewitze .
0,767 von vîantlîcher râche .
0,768 von spotte unde von bispræche .
0,769 von lûgenen und meineiden .
0,770 und von allen dîngen die uns scheiden .
0,771 ûz dem himelrîche .
0,772 des helfet uns alle gelîche .
0,773 daz die got an uns vertîlige .
0,774 und daz er uns insigele .
0,775 mit dem slûzzel der minne .
0,776 diu ist ein kûninginne .
0,777 aller geistlîchen gâbe .
0,778 von der kumet sælde unde genâde .
0,779 vride unde ebenhellunge .
0,780 milte und barmunge .
0,781 kiusche unde reinicheit .
0,782 gehôrsam unde gedulticheit .
0,783 die lobete unser hêre got .
0,784 dô er wider sîner junger quat
0,785 "hoc est praeceptum meum .
0,786 minnet einander sam ich iuch tuon ."
0,787 daz errecket Grêgôrius allerbezziste .
0,788 er sprichet daz alles guotes werkes este .
0,789 nehein grüene niemer mege gewinnen .
0,790 si ne wonen in der wurze der minne .
0,791 diu ne mac niender wesen eine .
0,792 ire êre hât si gemeine .
0,793 mitsament der diumuote .
0,794 von der kumet aller slahte gûete .
0,795 alle tugentlîche site .
0,796 unde elliu êre dâ mite .
0,797 triuwe unde wârheit .

0,798 zühte unde vrümicheit .
0,799 mit disen tugentlîchen scharen .
0,800 müeze uns got iemer bewaren .
0,801 unze wir dem tiuvel an gesigen .
0,802 des helfet alle heiligen .
0,803 nû schulen wir dir hêrre .
0,804 bevelhen lîp unde sêle .
0,805 beidiu ze dem êresten und ze lezzesten .
0,806 wande dû allerbezziste .
0,807 unser nôt unde unser angest weist .
0,808 an dir stêt alzoges der volleist .
0,809 swes sô wir dîn heiligen haben gebeten .
0,810 die solen dîne genâde an uns vertreten .
0,811 daz dû durch ire willen .
0,812 müezest genædiclîchen ervûllen .
0,813 swes sô wir in dînem namen .
0,814 mit ire boteschefte gegert haben .
0,815 nû erledige dîne knehte .
0,816 von allem unrehte .
0,817 von geistlîcher unzühte .
0,818 von schaden und von gesühte .
0,819 von dîn selbes zorne .
0,820 von dem êwigen verlorene .
0,821 von unreinen gedanken .
0,822 von den glüeienten vanken .
0,823 die daz vleisch huorlîchen zünden .
0,824 von tiuvelîchen sünden .
0,825 vore grôzer bekorunge .
0,826 von der êwigen verdamnunge .
0,827 von aller slahte leide .
0,828 und an der wîle sô dâ scheide .
0,829 diu sêle von dem lîbe .
0,830 hêrre Krist dû uns entlîbe .
0,831 durch die engelische boteschaft .
0,832 diu dîner muoter wart brâht .
0,833 und durch die toufe die dû entvienge .
0,834 und durch die vasten die dû begienge .
0,835 uns armen ze einer lêre .
0,836 und durch dînes kriuzes êre .
0,837 durch dîner sêle hinevert .
0,838 dû dâ selbe wære daz opfer und der êwart .
0,839 durch dîn urstende .
0,840 diu unserm tôde gap ein ende .
0,841 durch dîner ûfverte sigenumft .
0,842 durch des heiligen geistes kunft .
0,843 kum uns armen ze heile .
0,844 an dînem urteile .
0,845 daz wir iecht erarnen des tages .

0,846 die räche des êwigen slages .
0,847 swer danne wirdet gescheiden von dînen kinden .
0,848 der ne mac niemer mêre vinden .
0,849 vore dir decheiner slahte genâden .
0,850 sô suochet er leider ze träge .
0,851 wan ob iz sîn mehte .
0,852 daz sîn tegelîchen gedæhte .
0,853 dîn muoter und alle dîn heiligen .
0,854 im en würde niemer von dir entliben .
0,855 über in ist diu urteile gegeben .
0,856 daz er iemer muoz tôtlichen leben .
0,857 in dîner âgezzel .
0,858 dem wære vile michel bezzer .
0,859 daz er nie mennische wære worden .
0,860 daz heiz uns êr besorgen .
0,861 lieber hêrre sùezer vater .
0,862 die wîle dû uns antlâzes wil gestaten .
0,863 sô gip uns tugenlichen ze lebenne .
0,864 daz wir mit dînem veterlichen segene .
0,865 des tiuvels uns erweren
0,866 êr er uns des rîches mûge enterben
0,867 daz uns dîn selbes tât entslôz .
0,868 te rogamus audi nos .
0,868a communis .
0,869 nû ist rehte unde bruoderlich .
0,870 daz wir umbe einander alle gemeinliche .
0,871 in der gotelichen . minne .
0,872 an die türeringe .
0,873 dîner barmunge .
0,874 hêrre küninc aller künige .
0,875 vile emzlichen klopfen .
0,876 mit zeherlichen tropfen .
0,877 daz dû uns vride und gesunt verlihest .
0,878 und unserm herzen nie ne verzîhest .
0,879 des heiligen geistes genâde .
0,880 unde aller slahte lâge .
0,881 unser vîande zerstoerest .
0,882 unde dîne kristenheit erhoerest .
0,883 und ir vaterlichen genâdest .
0,884 und beschirmest unsern hêrren den bâbes .
0,885 der uns alle sol besorgen .
0,886 unde allen pfefflichen orden
0,887 machest einvaltic .
0,888 an dînen geboten êhaltic .
0,889 und geruochest alle kristene .
0,890 ze dînem lobe ze stätigenne und ze vristenne .
0,891 die dû mit dînem bluote erlôstest .
0,892 und daz dû die armen getroestest .

0,893 machest gesunt die ungesunden .
0,894 erloesest die gevangen und die gebunden .
0,895 und geruochest die ellenden .
0,896 in ire vaterlant ze sendenne .
0,897 und alle die ûf wazzer varn
0,898 vore allen vreisen bewaren .
0,899 daz dû künige unde rihtære .
0,900 und ander ire volgære .
0,901 müezest dû gevestenen an dem rehten .
0,902 und verdrückest die widervehten .
0,903 kristenlîches gelouben .
0,904 unde alle die offenlîchen olde tougen .
0,905 mit vreuele sünden oder mit vorhten
0,906 niene lâzest werden die verworhten .
0,907 si ne gebüezen in disem lîbe .
0,908 hunger unde besez dû vertrîbe .
0,909 diene der erde von dem lufte .
0,910 daz wuocher zîtlicher genuhte .
0,911 zevüere aller slahte irretuome .
0,912 gip uns mæzigen rîchtuom .
0,913 und dâr über nie mêre .
0,914 unde lône vater hêrre .
0,915 mit dînem zehenzicvaltigem lône . gelte .
0,916 die uns in diser werlte
0,917 minnent . spîsent . unde vazzent .
0,918 vergip allen den die uns hazzent .
0,919 die dînes gelouben haben verjehen .
0,920 genâde allen sêlen .
0,921 an ire hineverte .
0,922 dîn stap und dîn gerte .
0,923 diu sî nâch der bete Dâvîdes .
0,924 ein trôst der sêle und des lîbes .
0,925 daz dû mich geruoches ze bekleibenne
0,926 mit dînes tisches . âleibe .
0,927 und mit dînem kelche trunken machen .
0,928 er meinet mit den oberisten zwein sachen .
0,929 dînes lîchnamen und dînes bluotes .
0,930 want nieman tuot sô vile guotes .
0,931 swer sich dâr von scheidet .
0,932 im ne sî vore dir verteilet .
0,933 des ne lâ nieman wesen âne .
0,934 die von dir hêrre Krist kristiâne .
0,935 mit dem namen und mit den werken sint .
0,936 samene hêrre vater dîniu kint .
0,937 in der himelischen Jerusalem .
0,938 der selben genâden lâ niht bestên .
0,939 dînen schalc Heinrîchen .
0,940 der vile harte einlîchen .

0,941 sich dâr ûf gevlizzen hât .
0,942 swer mit sinne ditze gebet verstât .
0,943 sweliche genâde er dâ mit erwerbe .
0,944 daz er der teilnûmftic werde
0,945 ditze gebet heizet letanîe .
0,946 daz entvâch dû vrouwe sancta Maria .
0,947 mit allem himelischen here .
0,948 daz uns got alles des gewere .
0,949 des [...]